

Evening Dogri (NSD)

21-05-2024

खास खबरां

- 1 लोकसभा चुनाव दे खीरले दऊं गेडें लेई चुनाव प्रचार तेज। सब्बे पार्टियां मते शा मते लोकें गी अपने पक्खे च करने लेई अनकथ जतन करै करदियां न।
- 2 दिल्ली दी इक अदालत आम आदमी पार्टी दे लीडर मनीष सिसोदिया दी न्यायिक हिरासत 31 मई तोड़ी बघाई दित्ती ऐ।
- 3 समूलचे मुल्ले च अज्ज आतंकवाद रोधी ध्याड़ा मनाया जा'रदा ऐ। इस सिलसिले च केई कार्यक्रमें दा सरिस्ता करिये आतंकवाद गी दना बरदाश्त नेई करने दे धेइयै गी पक्का कीता गेआ।
- 4 कर्नाटक दे मुखमन्त्री होरें जनता दल दे सांसद प्रज्जवल रेवन्ना दा राजनयिक पासपोर्ट रद्द करने लेई केन्द्र गी चिट्ठी लिखी ऐ।
- 5 विश्व पैरा एथलेटिक्स च क्लब थ्रो दे मकाबले च भारत दी एकता भयान नै सुन्ने दा ते कशिश लाकड़ा नै चांदी दा तगमा जित्तेआ ऐ।
- 6 आईपीएल 2024 दा पैहला क्वालीफायर मैच अज्ज कोलकाता नाईट राईडर्स ते सन राईजर्स हैदराबाद बश्कार।
- 7 मौसम विभाग नै अगले त्रऊं दिनें तोड़ी उत्तर-पच्छमी भारत दे पदरे इलाके, उत्तरी मध्यप्रदेश ते गुजरात च सख्त गर्मी पौने दे आसार न।

<><><><><><>

Campaigning

लोकसभा चुनाव दे खीरले दऊं गेडें लेई प्रचार अभियान जोरें-शोरें जारी ऐं इनें दऊं गेडें तैह्त औंदी 25 मई ते पैहली जून गी वोट पोआए जांगन। सब्बे पार्टियां बड्डे-बड्डे लीडरें ते स्टार प्रचारकें दी मदद कन्नै रोड शो रैलियां ते जलसे जलूस कड्डियै मते शा मते मतदाताएं गी अपने हक्के च करने लेई अपनी पूरी टिल्ल ला करदे न। दिल्ली दिऐं सब्बने लोकसभा सीटें लेई बी चुनाव प्रचार चलै करदा ऐ। बीजेपी दे राष्ट्रीय अध्यक्ष जे. पी.नड्डा होरें चांदनी चौक ते पालम इलाकें च अज्ज जनसभाएं गी संबोधत कीता जिसलै जे आम आदमी पार्टी दे संयोजक ते दिल्ली दे मुखमन्त्री अरविंद केजरीवाल होरें पूर्वी दिल्ली च रोड शो कीता। दिल्ली कांग्रेस दे अध्यक्ष देवेन्द्र यादव ते होर दुइएं पार्टिएं दे नेता बी चुनाव प्रचार च रूज्जे दे न। राजधानी दिल्ली च शनिवारें वोट पोआए जाने न। तोआई बिहार च अज्ज प्रधानमन्त्री नरेन्द्र मोदी होरें अपनी रैलिये च कांग्रेस गी इक वंशवादी पार्टी गलांदे होई आखेआ जे इस पार्टी दा मकसद शड़ा इक्कै परिवार दा हित्त दिक्खना ऐ। मोतीहारी च इक रैली गी संबोधत करदे होई उनें आखेआ इंडी गठबंधन दियां सब्बे पार्टियां भारत विरोधी न, सनातन विरोधी न ते भ्रष्टाचार च लिप्त न ते देश दी जनता अपने वोट दी ताकत कन्नै इनेंगी सबक सखाग। मोदी होरें गोरिया कोठी च बी इक रैली गी संबोधत कीता। तोआई आम आदमी पार्टी दे पंजाब दे साबका विधायक जगबीर सिंह बरार बीजेपी शामिल होइ गे न। उनेंगी अज्ज नमीं दिल्ली च बीजेपी मुख्यालय च पार्टी दे राष्ट्रीय महासचिव तरुण चुग हुंदी मजूदगी च बीजेपी च शामिल कीता गेआ।

<><><><><><>

Sisodia

दिल्ली दी राउज एवेन्यू अदालत नै अज्ज दिल्ली शराब नीति घोटाले कन्नै जुडे दे मामले च साबका उपमुखमन्त्री ते आम आदमी पार्टी दे नेता मनीष सिसोदिया दी न्यायिक हिरासत 31 मई तगर बघाई दित्ती ऐ। मामले दी अगली सुनवाई हून इस म्हीने दी 31 तरीक गी होग।

<><><><><><>

Karnataka CM

कर्नाटक राज्य दे गृहमंत्री जी.परमेश्वर होरें अज्ज आखेआ ऐ जे राज्य सरकार नै यौन शोषण दे आरोपी ते हासन दे सांसद प्रज्जवल रेवन्ना खलाफ जारी गिरफ्तारी वरंट दी बिनाह पर उंदा राजनयिक पासपोर्ट रद्द करने लेई विदेश मंत्रालय गी चिट्ठी लिखी दी ऐ। उनें आखेआ जे मुख्यमंत्री सिद्दा र्मेइया होरें पैहले गै केन्द्र सरकार गी इक चिट्ठी लिखी चुके दे न पर कनूनी प्रक्रिया दी पालमा करदे होई हुन राज्य दे गृह विभाग आस्सेआ एह नमीं चिट्ठी लिखी गई ऐ। जनता दल सक्थूलर दे संरक्षक ते साबका प्रधानमंत्री एच.डी. देवगोड़ा हुंदे पोतरे 33एं बरे दे प्रज्जवल पर केई महिलाएं दे यौन शोषण दा आरोप ऐ। प्रज्जवल, हासन च होए दे मतदान दे बाद 27 अप्रैल गी जर्मनी रवाना होई गेआ हा ते अजे तोड़ी मुख्य नेई परतोआ।

<><><><><><>

Anti Terrorism

मुख्य भरे च अज्ज आतंकवाद—रोधी ध्याड़ा मनाया जा'रदा ऐ। एह ध्याड़ा साबका प्रधानमंत्री राजीव गांधी हुंदी पुण्यतिथि पर मनाया जंदा ऐ, जिंदी 21 मई 1991 च चेन्नई कोल इक ग्रां श्री पीरूमंबदूर च एलटीटीई दे आत्मघाती बम्बर नै हत्या करी दित्ती ही। एह ध्याड़ा लोकें गी आतंकवाद ते हिसां दे समाज ते राष्ट्र पर पौने आले माडे प्रभाव बारे जागरूक करने लेई मनाया जंदा ऐ।

<><><><><><>

FFMA Rajiv Gandhi

फ्रीडम फाईटर मैमोरियल एसोसिएशन (एफएफएमए) नै अज्ज साबका प्रधानमंत्री स्वर्गीय राजीव गांधी होरें गी उंदी पुण्यतिथि पर चेता कीता ते उंदे महान योगदान गी चेता कीता ते राष्ट्र निर्माण च उंदिएं अनकथ सेवाएं ते उपलब्धिएं पर लोह पाई। साबका प्रधानमंत्री हुंदे 33में शहादत दिवस दे मौके न्यू रिहाडी जम्मू च एफएफएमए दे दफतरें च लग्गे दे इक प्रभावशाली समारोह च उनें गी निग्धी श्रद्धांजलि अर्पित कीती गई। उत्थें मजूद किट्ट गी संबोधत करदे होई एसोसिएशन दे अध्यक्ष राजीव महाजन होरें सब्बने शा लौहकी उमरी दे प्रधानमंत्री राजीव गांधी हुदिएं सेवाएं गी चेता कीता, जिनें मुख्य दे नोजवानें कन्नै निबडने लेई "बिजन" दित्ता। उनें मुख्य च सूचना प्रौद्योगिकी ते टेलीकॉम क्रांति आली वोट पाने दी बरेस 18 बरे करियै उनें नोजवानें गी सशक्त कीता। श्री महाजन होरें आखेआ स्वर्गीय गांधी मुख्य च पंचैती राज सरिस्ते दे जनक हे ते इनें 73में ते 74में संशोधनें कन्नै पंचैती राज गी संवैधानिक दर्जा ते इख्तेयार दित्ते। महिलाएं लेई 38 प्रतिशत आरक्षण दी बत्तपट्टी कीती ते पंचैती राज सरिस्ते दिएं सब्बने त्रऊं सतहें पर पट्टीदर्ज जाति ते पट्टीदर्ज जनजातीएं गी अनुपात दे स्हाबै नुमसंयदगी पक्की कीती। उनें जमीनी सतह तगर लोकें गी अधिकार इख्तेयार मुंतकिल कीते।

<><><><><><>

Para Athletic

भारत दी एकता भयान नै जापान च विश्व पैरा एथलेटिक चैंपियनशिप च महिलाएं दी एफ—51 क्लब थ्रो स्पर्धा च सुन्ने दा तगमा हासल कीता ऐ। उनें 20.12 मीटर कन्नै इस सीजन दा बेहतरिन प्रदर्शन बी कीता। भारत दे गै कशिश लाकड़ा नै 14.56 मीटर कन्नै चांदी दा तगमा जित्तेआ जिसलै दे अल्जीरिया दे नादजेट बाउचरफ नै केह दा तगमा अपने नां कीता। एहदे शा पैहले कल पैरा एशियाई खेड्डें च सुन्ने दा तगमा जित्तने आली दीप्ती नै महिलाएं दी 400 मीटर टी—20 श्रेणी दी द्रौड़ च 55.07 दा रिकार्ड त्रोड़ियै सुन्ने दा तगमा जित्तेआ हा।

<><><><><><>

IPL

आईपीएल 2024 दा पैहला क्वालीफायर मैच एल्लै अहमदाबाद दे नरेन्द्र मोदी स्टेडियम च सनराईजर्स हैदराबाद ते कोलकाता नाईट राईडर्स बश्कार खेड्डेआ जा'रदा ऐ। हैदराबाद दी टीम नै टॉस जित्तिथै पैहले बल्लेबाजी करने दा फैसला लैता ऐ। एल्लै हैदराबाद नै 2 ओवरें च इक विकेट दे नुक्सान च 16 रंज बनाई लैते दे न।

Indian Exports

मुंबई च अंतराष्ट्रीय वस्त्र मेले दे 17में संस्करण च भारत दे लौहके उद्योग क्षेत्र थमां भारतीय “लाब्बे-लवास” बाहरले मुख्य च भेजने आले 35 कोला मते निर्यातकें दा लक्ष्य मुख्य दे बेह्तरीन डिजाइन ते अज्जै कल्लै दे फ़ैशन दे मूजब तैआर कपड़े-लवासें दा प्रदर्शन करना ऐ। इंदे रिवायती ते हत्थें कन्नै तैआर कपड़े शामिल न। मेले च केई महिला उद्यमी बी हिस्सा लै करदियां न। मेले च हंडनसार ते पर्यावरण दे अनुकूल तैआर आकर्षन दा केन्द्र बना करदे न।



Heat Wave

भारती मौसम विभाग नै अगले त्रै रोज उत्तर-पच्छमी भारत दे पद्धरें इलाके, उत्तरी मध्य प्रदेशे ते गुजरात च गर्मी दी सख्त आस्तै रैड अलर्ट जारी कीता ऐ। मैहकमे दा गलाना ऐ जे पंजाब, हरियाणा, चंडीगढ़, दिल्ली, पूर्वी ते पच्छमी राजस्थान, पच्छमी उत्तर प्रदेश ते उत्तर पच्छमी मध्य प्रदेश च इस म्हीने दी 24 तरीक तोड़ी गर्म लैहर थमां सख्त लूह पौने दी संभावना ऐ। मौसम विभाग नै अगले चार रोज उत्तर-पच्छमी ते मझाटले भारत च तापमान च 2-3 डिग्री दी बढ़ोतरी होने दी पेशगोई कीती ऐ।



Cultural Div. Day

अज्ज वार्ता ते विकास आस्तै सांस्कृतिक बन्न सबन्नता दा विश्व ध्याड़ा मनाया जा'रदा ऐ। एह ध्याड़ा ना शड़ा विश्व दी संस्कृतिएं दी समृद्धि उजागर करने आस्तै सगुआं शांति ते टिकाऊ विकास दे लक्ष्य गी हासल करने आस्तै बक्ख-बक्ख संस्कृतिएं बशकार वार्ता दी भूमका पर लोह पाने आस्तै बी मनाया जंदा ऐ। UNESCO मूजब सांस्कृतिक ते नमिएं काहडें आला सेक्टर विश्व च विकास दा सब्बने थमां शक्तिशाली इंजन ऐ। एह सेक्टर विश्व च 4 करोड़ 80 लक्ख थमां बद्ध नौकरियां उपलब्ध करोआना ऐ, जिंदे चा अद्वियां नौकरियां महिला करदियां न। एह सेक्टर 30एं ब'रे शा घट्ट उमरी दे सब्बने थमां बद्ध लोकें गी रोजगार उपलब्ध कराने आला सेक्टर बी ऐ। पर फही बी सार्वजनिक नीतिएं ते अंतराष्ट्री सैहयोग च इस सेक्टर गी ओहदी बनकदी थाहर हासल नेई होई ऐ।

